

«Білімді дамыта алмайтын елдің болашағы жоқ»

Қазір әдістеме саласында әлемдік деңгейдегі зорық, тиімді әдіс-тәсілдерді зерттеу, дамыту заман талабы.

Мемлекеттік тілді қашықтан оқыту әдістемесі жайында елімізде алғаш рет сөз еткен тіл жанашыры, педагогика ғылымдарының кандидаты, доцент Жамашева Жанар Рахматуллақызы болды. 2005 жылы кандидаттық диссертациялық жұмыстың тақырыбын аларда көп ойланып, кредиттік білім жүйесінде жаңалығы мол, тың тақырып болғандықтан қашықтан оқыту әдістемесіне қызығушылық танытты.

«Мемлекеттік тілде іс қағаздарын қашықтан оқыту әдістемесі» атты тақырыпта, жетекшілік жасайтын ұстаз, тақырып бекітерде қиындыққа тап болды. Себебі, тақырып бұрын-соңды қарастырылмаған, шетелдік ғалымдардың зерттеу жұмыстарын қарап, көп зерттеуді қажет ететін тақырыпты жазуда жетекші табу да оңай болмады. Жаңалықтың шег жағасын ғана түсінетін ғалым, жұмысқа басшылық жасай қоюы да екіталай еді. «Білікті адам айтпай - ақ жаныңды ұғар» деп, Махмұд Қашқари айтқандай, әдіскер-ғалым, педагогика ғылымдарының докторы, академик Ф.Ш.Оразбаеваны іздеп барып, ақылдасқанда, жаңалығы мол тақырып екендігін сезе отырып, бағыт-бағдар беріп, жақсы қуаттады. Ғалымның аты ғалым, Жанардың осы жұмысына деген құштарлығын сезген жетекші Оразбаева Фаузия Шәмшиқызы «Зерттеу жұмысы өзінді де, мені де ұятқа қалдырмайтындай болуға тиіс» деп ақыл берді.

Әдістеме ғылымы теориялық білім мен іс-тәжірибені сәйкестендіруді толық қажет ететін ғылым. Ақпараттық жүйелер мамандығына Жанар «Мемлекеттік тілде іс қағаздарын жүргізу» пәнінен сабақ беріп, тәжірибе жүзінде алдымен іске асырып, зерттеп алды. Жұмыс қорғауда жаңалығы мол жұмыс ретінде танылып, алдын ала қорғауда әдіскерлердің назарын өзіне аудара білді.

Ж.Жамашева Абай атындағы Қазақ Ұлттық Педагогикалық университетінде Қазақ тілінің теориясы мен әдістемесі бағытында «ЖОО-да мемлекеттік тілде іс қағаздарды қашықтан оқытудың әдістемесі» атты кандидаттық диссертациясын 2008 жылы ойдағыдай қорғап шығады. Мұнан өзге де жетістіктері айтарлықтай. Педагогика ғылымдарының кандидаты, доцент Ж.Р.Жамашева 2006-2009 жылдар аралығында Абай атындағы Қазақ Ұлттық Педагогикалық университетінің біліктілікті жоғарылату бөлімінде және облыстық басқармаларда «Мемлекеттік тілде іс қағаздарды қашықтан оқыту» атты семинарлар өткізді. 2009 жылы облыстық тіл басқармасы ұйымдастырған конкурста «Үздік оқытушы» атанды. 2012 жылы «ЖОО-да мемлекеттік тілде іс қағаздарды қашықтан жүргізу» атты электронды оқулығы баспадан жарық көрді.

**Рана Арынбаева,
М.Әуезов атындағы
филология факультеті
Мемлекеттік тілді оқыту
кафедрасының аға
оқытушысы.**